

عيونها الحلوة



شُفت عيونها الحلوة ناديتني
قالتلي تعالي وخذني معاك
خُدنى لدنيا جديدة وسيبني
أدوق الحب واعيّش فى هواك

روحت بسرعة أخذت إيديها
وقلبي عشقها ف غمضة عين
حبها عشش جوه ف قلبي
زى الورد ملا البساتين

جوه عيونها لمحت حكاية
حكاية حب جمع قلوبين
لاجل عيونها أبيع الدنيا
دى هي حياتي وضى العين

لما باشوف ف عيونها الضحكة
قلبي بيبقى سعيد فرحان
وانا لو مرة لمحت دموعها
روحي بتغرق ف الأحزان

أصل عيونها لما باشوفها
باشوف الحب ف كل مكان
جوه عيونها نهر محبة
يفيض ع الدنيا بكل حنان